

永  
定  
河  
志

永定河志總目

卷首 恭紀

諭旨紀

宸章紀

碑文 記 詩 匾 聯

巡幸紀

卷一 圖

永定河簡明圖

永定河源流全圖

永定河屢次遷移圖

永定沿河州縣分界圖

卷二 表

職官表 一

總河	副總河	巡撫	南北岸分司
南北岸同知	筆帖式	千總	把總

職官表 二

總督	河道	同知	通判	南北岸十三
汛	南北汛六汛	河營	守備	千總
總	三角淀經制外委	鳳河東隄經制外		把
委	附聽差經制外委	兵額	道廳書吏	

道廳汎備千把俸工養廉  
馬乾錢糧  
道廳汎衙役民壯工食支給  
經制外委養廉

卷三  
考一

古河考

卷四  
考二

今河考

附兩岸減河  
會流河淀

卷五  
考三

工程考  
一

石景山工程

成規 橋式

卷六

考四

工程考

二

南北兩岸工程

疏濬中泓

成規 開壩式

卷七

考五

工程考

三

三角淀工程 疏濬下口 成規

浚船式 修守事宜

卷八

考六

經費考

歲修搶修疏濬 歷年銷案 河淤地畝  
防險夫地 柳陳地畝 葦場地畝 看火  
地畝 祀神公費 香燈銀  
河院書吏飯銀 河營兵餉

卷九

考七

建置考

碑亭 祠廟  
廨署公館

卷十

奏議

一

卷十一

奏議 二

卷十二

奏議 三

卷十三

奏議 四

卷十四

奏議 五

卷十五

奏議 六

卷十六

奏議 七

卷十七

奏議 八

卷十八

奏議 九



卷十九

附錄

古蹟  
碑記

永定河志例畧

河渠本史志之一門今勒為專書原以備掌故  
而資考鏡也永定河自石景山以下地平土疏  
其流挾沙擁泥惟善淤是以善徙昔人所以稱  
無定也

聖祖仁皇帝軫念

畿南時被水患

特命興修隄堰疏築兼施

賜名永定永賴萬世矣

世宗憲皇帝暨我

皇上

聖

聖相承善繼善述屢

遣王大臣相度經畫

指示機宜大工頻舉發帑動以數十萬計其間因時制宜  
隄防宣洩之方官民修守之策至周至密畢具

於

諭旨

宸章及臣工奏議中敬謹備錄用昭一代章程即為萬  
世法守顧永定河舊無成書九十餘年來奏牒  
不無殘缺據現存者叅稽史志搜錄諸書用資  
考証分紀圖表考奏議附錄六體為綱每體各  
依類分門為目總以河防工程為要領據事直  
書為體裁備錄原文不敢妄叅末議

一

諭旨紀凡為永定河

頒發者按年月恭錄

批示臣工奏摺及摺內奉有

硃批隨摺恭錄以昭

宸斷其原奏缺者仍恭錄於紀凡擡寫格式悉照

畿輔通志

一

宸章紀敬錄永定河碑刻

御製詩文祠廟匾聯

御製詩集內凡為永定河所作篇什俱按年恭錄

一

巡幸紀恭逢

鑾輅

閱視河工按年恭錄

一治河先覽大局圖其起訖可得領要故繪永定

河簡明圖於諸圖之前

一永定河發源山西寧武至京西西山出口幾一  
千里經行之處注地以實之兩涯會入之水注  
水以別之出山而南經石景山至天津入海亦  
幾三百里自建隄修防以來一切隄埽閘壩汎  
界衙署祠廟館舍及兩岸減水引河下游滙流  
河淀隨地附載庶尋源竟流瞭如指掌故繪源  
流全圖

一永定河自建隄以來下口遷移凡六次如統繪  
一圖注說滋繁形勢易混轉不得所以遷移之  
故按次分繪庶流覽分明兼可悟因時制宜之  
意故繪屢次遷移圖

一永定河流經宛良涿霸固永東武境內沿河八  
州縣與有協防之責顧犬牙相錯必正其經界  
斯知隄河所隸即民社所關况附隄十里村莊  
撥歸汛員管轄亦必劃清以昭修守故繪沿河



州縣分界圖

一職官表因康熙三十七年總河而下初設分司同知筆帖式等官雍正四年改設河道同知通判佐雜等員前後異職故分為二表其異官同格者尺幅無多則以類相次用漢書百官公卿表式表前叙設官裁復各由及駐劄地方所管工段表後附列各官俸廉額數支給衙門吏役名額工食銀數

一河之上游累代無大遷改出山而南始遷徙不  
可勝紀然治漂之稱名既異漂濕之書寫亦殊  
會入經行遂致支離又河所經行必紀其地以  
實之而累代郡縣沿革不同槩注則近於志地  
而非志河不注則雖知所經之地而究不知其  
地之實在何處自漢以來志水之家鄺道元水  
經注最為詳確且以魏人注漂水更為親切取  
以為經而以史冊諸水分段緯之為古河考凡

匯入諸小水雙行附注以免繁雜凡所引經由  
古地名以今地名附注其下或注在今某處某  
方若干里庶幾一望了然今河源流其上游則  
以前禮部侍郎齊召南所著水道提綱為經証  
以前總督方觀承遣員升赴晉所查真源會入  
經行諸圖說晉省直省諸圖志頗相符合出山  
而南則工程案牘所載丈尺炳然可據下口六  
次遷改舊跡亦皆可指數而分洩之減河會流

之河淀現在朗如列眉古之河流如彼今之河流如此則此河之不可不治與此河之所以難治固已較然可睹矣

二工程考按現今石景山同知南岸同知北岸同知三角淀通判四廳所轄分為四段每段前叙隄工起止總數並所轄汎屬後按各汎挨號編次每號內如有月隄舊隄廢隄閘壩舊閘壩俱從附列其十里村莊既歸汎管原為隄防亦附

隸焉疏濬船隻雖時設時裁亦闕利導附錄以  
存其概修守事宜則現在遵循者種柳歲報雖  
有額數而活枯淤刷難定又間有火毀風拔以  
及工用不能如數賒存其橋閘浚船諸式及永  
定道成規按工編入以備稽考



一經費考詳載道庫錢糧以稽出入凡歲修搶修  
疏濬及另案工程動用銀兩赴部請領河淤險  
夫柳隙各地畝租銀由州縣徵解香火地租附

八以從其類祀神公費香燈銀兩河院飯銀分  
列備考兵餉則州縣地丁按季批解者

一建置考紀碑亭祠廟文武官署及防汛公廨奏  
建年月地方房屋間數估銷銀兩

一奏議因年久卷殘有原奏存而部覆缺者有部  
覆存而原奏缺者皆錄存之凡錄奏議前具年  
月以便查覽

一永定河自發源歸海千有餘里前人著述罄竹

難書今採石景山至三角淀古蹟碑記有關河  
務者彙為附錄

乾隆五十四年歲次己酉

署直隸永定河道臣陳琮謹擬

永定河志目錄

卷首

恭紀

諭旨紀

宸章紀

碑文

記

詩

匾

聯

巡幸紀



永定河志卷首

恭紀

諭旨紀

聖祖仁皇帝諭旨

康熙三十一年二月

上諭渾河隄岸久未修築各處冲決河道漸次北移永  
清霸州固安文安等處時被水災為民生之憂可詳  
加察勘估計工程動正項錢糧修築不但民生永遠  
有益貧民借此工值亦足以養贍家口欽此

康熙三十七年二月二十五日

諭內閣霸州新安等處此數年來水發時渾河之水與保定府南之河水常有泛漲旗下及民人莊田皆被淹沒詳詢其故蓋因保定府南之河水與渾河之水滙流於一處勢不能容以致氾濫此二河道著左都御史于成龍往保定府南河著原任總督王新命往作何修治令其水自分流詳看繪圖議奏今值農事方興不可用百姓之力遣旗下丁壯備器械給以銀

米令其修築伊等往時部院衙門司官筆帖式酌量  
奏請帶往於十日之內即令啟行欽此

康熙四十一年六月初三日大學士伊桑阿馬齊  
張玉書吳璵熊賜履學士來道常壽鐵圖紀爾塔  
渾王九齡曹鑒倫劉光美等奉

上諭朕因永定河南岸不時衝坍特旨令將南岸修築  
石隄者來甚有裨益今黃河南岸自徐州以下至於  
清口通行修築石隄可否永遠有益若果有益現在

國帑不為缺少朕於錢糧一無所惜修築此隄應於何處採取石料作何轉運約幾年可以告成著張鵬翮齊集河員詳議具奏欽此

康熙四十二年二月初五日

諭永定河分司朕觀黃河險要地方應下挑水埽壩現今永定河朕親指示挑水等工俱有裨益爾遵照朕指示式樣前往烟墩九里岡龍窩三處築挑水壩數座試看有無裨益雖被衝壞無妨完工之日令該地

方官盡心防守如有蟄陷不時修葺可將此旨傳與  
總河張鵬翮速派賢員令其多備物料夫匠於朕回  
鑒之前完工需用錢糧與爾無涉不可經手工完將  
用過錢糧記明具奏如遇桃汎水發即行停止欽此  
康熙四十三年四月二十四日吏部尚書兼直隸  
巡撫李光地奉

上諭永定河分司已經另補有人分司郭治著補為南  
岸同知新設同知湯彝著改為北岸同知俱令掌管

錢糧收發如僱夫辦料有應行文地方官之處分司  
行同知轉行料理欽此

康熙六十年二月初四日大學士馬齊等議覆工  
部東撫李樹德折本啟奏奉

旨這事情九卿遣堂官甚是朕屢次南巡曾細閱河道  
留心於此是以於河道情形知之甚悉此處不讓他  
人雖欲不言而不得如山東運河自西河之水流入  
此河從前百姓以為宜開通具呈亦曾開過後又具

呈亦曾堵過開者何意堵者又何意務使悉此等緣  
故方可以定其應開與否不然則虛耗錢糧矣山東  
運河俱係引入滕縣嶧縣等湖之水以為運糧之助  
歷年來運河之水至於淺少者皆因沿河傍湖一帶  
添開於山東地方水田雖覺有益而未必有益於他  
處朕屢次往河道看來汶河之水自修分水龍王廟  
分流之後七分南流三分北流南流之水有一閘將  
此閘堵塞水俱北流古人相地方之形勢就其高下

隨其水性而能為此者實屬善策再洪澤湖有民之  
村莊墳墓田宅甚多修高家堰隄以聚水使其自上  
流下以拒洪澤湖之水更為神妙此處即朕躬亦不  
能承當即如暢春園一帶之河水俱入田內是以流  
至京城者甚少永定河之水亦俱引入田內是以每  
年四五月間水乾流絕河身沙壅倘有大水流入被  
壅沙堵塞以致泛溢為此查得牯牛河將清水引入  
永定河內此水長流不絕不但不致沙壅即大水來



世宗憲皇帝諭旨

時亦不致泛溢此處巡撫不知即九卿大臣亦俱不知或張鵬翮大略曉得將此旨爾等傳與九卿欽此

雍正元年九月初六日兵部右侍郎牛鈕奉

旨直隸巡撫李光地將永定河下口柳岔之處河身淤塞甚高隄岸加高等因啟奏爾前往會同巡撫分司或加高隄岸或挑引河或另挑河之處通同確勘具奏此去爾所知賢能章京筆帖式挑選帶去欽此

雍正二年九月十九日九卿議奏河工應行奏銷錢糧俱於年內題銷奉

上諭九卿議將康熙六十年六十一年河工用過錢糧未經題銷各案速行查明於歲內造冊題銷朕思此事難行令河臣查奏果係今年斷不能完如將此事交於伊等能於歲內完結乎九卿並未計及便與不便遂行如此議奏者特謂年內如不能題銷河道總督等自必題請展限姑且推委內外事情俱屬一體

凡事皆當揆情度理酌量事宜似此推諉議奏不但事件不能結案往返行文題奏反致多事年內果否能造冊奏銷之處著問九卿欽此

雍正三年十二月二十三日奉

上諭直隸地方向來旱澇無備皆因水患未除水利未興所致朕宵旰軫念莫釋於懷特命怡親王及大學士朱軾前往查勘今據查明繪圖陳奏所議甚為明晰且於一月之內衝寒往返而能歷勘周詳區畫悉

當以從來未有之工程照此措置似乎可收實效具  
見為國計民生盡心經畫甚屬可嘉著九卿速議具  
奏至於工程應用人員若交與九卿揀選恐有掣肘  
即令怡親王及朱軾揀選請旨其從前差往修城修  
隄之員俱著於水利工程處一同辦理欽此

雍正四年六月初九日工部奉

旨爾部每年派司官前往石景山看守隄工殊屬無益  
應否交與地方官或永定河道管理之處爾部會怡

親王議奏欽此

雍正四年十月二十日奉

上諭怡親王等督率官員興修水利今年已有功效夏  
秋以來地方悉無水患而新種稻田又皆收穫覽怡  
親王等所奏朕心深為慰悅著發於內閣九卿等公  
看其在工人員或於此時議叙以示鼓勵或俟工程  
告成之日議叙著內閣九卿會議具奏欽此

雍正五年七月二十一日大學士朱軾奉

上諭者天氣不似無雨的各處河道工程要緊爾可說  
與怡親王多委人員竭力防護毋得懈弛其已經衝  
潰之處務須作速搶修完固勿致疎虞欽此

雍正五年八月初四日 和碩怡親王面奉

上諭治河一事雖宜順水之性然水性亦有萬不能順  
之處全憑隄岸堅固以資捍禦凡漫溢之水不能奪  
溜大抵各處沖漫皆由隄岸不堅所致更有民間車  
道碾損隄岸一遇水泛每多沖漫嗣後遇有此等隄

岸緊要損傷之處略加石工所費亦自無多爾等可  
將此事傳與江南山東河南但有隄工之處一體遵  
奉欽此

雍正五年八月十八日 和碩怡親王大學士朱

軾請

旨查河奉

上諭張燦陳儀等身居工次必能經畫誠恐爾等往查  
伊等不無卸責且直隸地方遼濶爾等豈能遍歷但

行文各該局各河道等令其將所管地方現今加修工程查看明白作速報來爾等商確妥當冬底再行覆勘至於直隸地方向來衆水散漫今則並歸一處或恐水大難容隄堰之卑薄者亟宜酌量加高培厚然隄岸之不固者工員多以沙多土鹹為詞殊不知土性雖有不齊功到自能堅實此承修隄工者必以堅實為主而隄工之堅與不堅只在遇水之決與不決則承修隄工者務期永固不致潰決乃為盡善耳



欽此

雍正六年五月二十二日

諭工部從前朕意凡遇隄岸道路似應略加石工以防車輛踐踏等弊此朕一時之見曾經詢問怡親王及齊蘇勒皆以為可行是以頒發諭旨今田文鏡奏稱河南兩岸隄工車道久經加土修墊以防踐踏不必更加石工若土石兼用轉不堅固等語所奏甚為明晰具見實心任事深為可嘉著將田文鏡所奏及朕

此旨傳與直隸江南山東凡有隄工之處該管大臣  
因地制宜酌量辦理不可迎合朕旨強行悞事欽此  
雍正十二年四月十四日奉

上諭據直隸河道總督顧琮等奏稱永定河渾流洶湧  
全賴下口深通庶上流得以暢注入淀乃淘河以南  
漸積填淤河流梗塞正擬挑濬疏通以資宣洩仰蒙  
天賜引河自然開刷二十餘里之程畚鍤不勞民力四千  
餘丈之遠疏排悉出天工顯著嘉祥萬民歡忭等語

朕因畿輔河渠關係重大時時軫念莫釋於懷今於河臣籌議挑濬通疏之地仰蒙

天賜引河自然開刷不勞民力順軌通流

河神福佑羣生功用顯著應虔誠展祀以答

靈貺其應行典禮該部察例具奏欽此

雍正十三年七月二十八日工部議覆直隸河道總督朱藻奏官民捐納土方應請分別議叙奉

上諭向來沿河文武官弁有種柳葦議叙之例遵行已

久不便停止今若又添土方物料議叙之例恐奉行不善將來必致滋弊累民凡本地方現任官弁捐輸土方物料者尤為不可概不准行若紳衿民人等情願捐輸者著分別定例議叙欽此

皇上諭旨

乾隆元年四月十七日總理事務王大臣等奉

上諭直隸不必設立副總河定柱著回京候旨另用直隸河務雖有專辦之總河著總督李衛兼行管理欽

此

乾隆元年五月初一日內閣奉

上諭朕惟撫安百姓必嚴察胥吏而修築工程之地弊端尤多關係更屬緊要聞直隸永定河每夏秋間有冲缺修築隄岸夫役物料不能不取辦於民間胥吏朋比作奸其人工物料價值肆意中飽毫無忌憚且將物料令民運送工所往返動經百里或數十里不等脚價俱係自備種種擾累吾民其何以堪嗣後河

工諸臣與協辦河務州縣官皆宜實心籌畫嚴行稽  
查無論歲搶修凡民夫物料應給價值務照實數給  
發不得聽信胥吏絲毫扣刻以致貽累百姓如有漫  
不經心仍蹈前轍者或經朕訪聞或被入題叅必從  
重處分特諭欽此

乾隆二年八月十九日奉

上諭直隸河道水利關係重大若但為目前補救之計  
而不籌及久遠恐於運道民生總無裨益前覽顧琮

李衛所奏尚非探本清源之論著大學士鄂爾泰親往詳勘形勢籌度機宜應如何改移開濬修築之處熟商妥議酌定規模仍交與顧琮李衛督率所屬該管官員遵照辦理欽此

乾隆三年四月初十日內閣奉

上諭直隸總督事件繁多難以兼顧河務李衛不必管理其一切河工事宜應交與總河專辦俾事權歸一方有裨益顧琮仍著前往會同朱藻一體悉心辦理

永定河志卷首  
母得遲悞欽此

乾隆四年三月十二日內閣奉

上諭國家興修工作僱募人夫原欲使小民實受價值  
以為贍養身家之計至於荒歉之年於賑濟之外修  
舉工程俾窮民赴工力作不致流移更非平時可比  
其安全撫恤之心亦良苦矣凡為督撫大吏及地方  
有司自當承宣德意敬謹奉行使閭閻均霑實惠方  
不愧父母斯民之職朕訪聞得各省營繕修築之類



其中弊端甚多難以悉數或胥役侵漁或土棍包攬或昏庸之吏限於不知或不肖之員從中染指且有夫頭扣剋之弊處處皆然即如挑濬河道一事民夫例得銀八分者則公然扣除二分應做土一丈者則暗中增加二尺或分就工程用夫一千名者實在止有八九百人以國家惠養百姓之金錢飽貪官污吏奸棍豪強之慾壑其情甚屬可惡是不可聽其積弊相沿而不加意釐剔者嗣後凡有興作之舉著該督

撫轉飭該管官員實力稽查務使工價全給民夫無絲毫扣剋侵蝕之弊倘該管官員稽查不力督撫即行嚴叅如徇庇屬員或失於覺察朕必於該督撫是問欽此

乾隆四年八月十八日內閣奉

上諭今年六月間豫省地方大雨如注川澤交盈分洩不及以致開封等屬被水之州縣甚多小民困苦朕心深為軫念已屢降諭旨多方籌畫賑恤撫字因思

濟饑拯溺目前之補救維殷而陂澤河渠善後之經營宜亟查豫省地方有淮潁汝蔡諸水經緯其間凡舊有河道俱達江湖第或因故道被埋或無支河導引是以水無容納之區勢必旁溢下有壅塞之處滂即難消聞撫臣尹會一現在檄令各屬勘估興修但愚民無知上游方事挑濬而下游填塞阻攔仍致水無去路於事何益著撫臣尹會一河臣白鍾山布政司朱定元細心熟籌專委管理河道明晰水利之大

員親勘全局通盤計算務使一律疏濬深通毋令各分疆界稍有阻滯再豫省之賈魯河原由江南地方全注入淮是廬鳳等處即豫省之下流也此時現有欽差大臣興修廬鳳河渠亦當同為留意從來疏濬河道上游十分用力而下游百計阻撓各處人情如此不獨豫省為然是在封疆大臣洞悉其弊勿為所欺庶幾原委暢流永無泛溢之患該部可將朕旨即行文豫省并有河道之各省督撫欽此

乾隆六年正月十八日奉

上諭永定河工關係重大著大學士伯鄂爾泰尚書公  
訥親乘驛前往會同總督孫嘉淦總河顧琮悉心查  
勘欽此

同日又奉

上諭昨因永定河放水經理未善以致固安良鄉新城  
涿州雄縣霸州各境內村莊地畝多有被淹之處難  
以耕種且居民遷移不無困乏朕與孫嘉淦不能辭

其責也用是寤寐難安深為厯念著大學士鄂爾泰  
尚書訥親會同總督孫嘉淦詳細查明被水處所應  
免錢糧若干速行奏請豁免先將此旨曉諭百姓知  
之欽此

乾隆九年五月二十四日吏部尚書協辦大學士  
劉於義直隸總督高斌會議修舉水利本月二十  
六日奉

旨依議畿輔興修水利乃地方第一要務必簡用得人

始能有益無弊總督高斌事件繁多難以專心水利之事協辦大學士吏部尚書劉於義曾任直隸總督及布政使於閩省情形素所練習若與高斌悉心籌畫經理自可成利濟之功而收永遠之效此時著劉於義前往保定會同高斌詳加計議酌定規條將來興修之時二人同心合力督率辦理務期有成以副朕望欽此

乾隆十二年四月初十日內閣奉

上諭大學士高斌現在奉差江南其直隸河道總督印務交與總督那蘇圖暫行管理欽此

乾隆十二年四月二十八日內閣奉

上諭直隸水利關係綦重是以

皇考特命怡賢親王及大學士朱軾等督修欲營水田以備不虞後以南北地利異宜難臻績效朕於乾隆九年復准言臣條奏特命大學士高斌協辦大學士吏部尚書劉於義相度今據奏順天保定河間天津等



府及順德廣平大名趙州等處各工俱先後告竣高  
斌劉於義屢次親詣工所往返勤勞及任事員弁皆  
著交部議叙但興舉大工必期實有成效可垂永久  
方為有益朕為畿輔生民永圖利賴是以不得已開  
捐期於去水之害收水之利如淫潦泛溢濬之而使  
有所歸則涸出者皆成沃壤而受水之區即可得灌  
溉之益今用項至七十餘萬兩然何處積害已除何  
處實效已著曾未詳晰確查具奏至籌畫善後良圖

亦非僅付之地方有司即可永遠保守弗墮者目今如何成效日後作何保固之處著軍機大臣等會同高斌劉於義詳查議奏欽此

乾隆十四年三月二十九日內閣奉

上諭直隸河道事務近年以總督兼理不過於伏秋汛至之時往來率屬防護工程俱已平穩所有直隸河道總督不必設為專缺即於總督關防勅書內添入兼理河道字樣其一應修防工程向係河道等官派

辦者俱照舊飭委辦理現在纂修會典將此載入欽此

乾隆十五年二月二十九日直隸總督方觀承面奉

上諭朕見永定河身之內建有房屋詢係窮民就耕灘地水至則避去雖不為害但其築牆疊壩未免有填河之患可即查明現在戶數姑聽暫住嗣後不得復有增添欽此

乾隆十五年二月二十九日直隸總督方觀承面  
奉

上諭朕閱永定河培隄取土類在隄外是以近隄多有  
坑坎甚屬非宜嗣後總令於河身內取土俾隄增高  
而河愈下庶為一舉兩得但須層方層起不得任挖  
成坑該督即傳諭所屬河員一體遵照辦理欽此

乾隆十五年六月初十日內閣奉

上諭永定河南岸三工五月二十九日河水驟長漫開

月隄已命尚書汪由敦馳驛前往會同總督方觀承  
悉心相度有應搶築疏濬之處現今熟籌妥辦惟是  
附近固安縣一帶窪地猝被漲漫其間禾稼不免損  
傷民房不免倒塌深軫朕懷亟應加意撫綏俾無失  
所所有酌借籽種及一切應行賑恤事宜即著公同  
籌畫一面奏聞一面辦理務令被水居民得沾實惠  
欽此

乾隆十五年七月初四日

廷寄工部侍郎三和直隸總督方觀承內開奉

上諭永定河三工漫口初擬合龍尚易為力該督方觀承董率河員駐工搶築期於速告厥成俾被水田禾早得涸出尚可補種蕎麥雜糧窮黎藉以餬口乃迄今匝月晝夜施工竭盡人事而時當伏汎水勢旋消旋長搶護椿埽屢被沖刷此時已屆立秋即令積水全消亦已補種無及所有賞給口糧及將來查辦賑恤業已屢頒諭旨自可遵照辦理至播種秋麥則不

妨俟至秋高潦盡為期尚早該督駐工日久通省素  
件應辦者甚多未便專顧隄工稽留下邑按察使玉  
麟曾任永定河道工程素所熟習可調至工所該督  
將堵築情形詳悉交明令與署道僧保住在工搶築  
日內天氣漸有霽色河流長落無常或於旨到以後  
玉麟來工之時溜平沙漲仰賴

天庥可以就緒合龍不過三五日間三和方觀承俱可竣  
事言旋如非旬日可了著交玉麟率同僧保住調集

物料在工辦理王麟到後方觀承回至保定辦事仍可不時稽察三和即著回京欽此

乾隆十五年七月初十日工部侍郎三和面奉

諭旨著寄信於直督方觀承令按察使王麟同署永定河道僧保住等度量水勢情形應緩應急如何加埽護隄之處接續辦理或現今水勢平緩即便加埽合龍或俟白露前後水性平定進埽合龍之處並保護隄岸埽壩務期詳慎妥協堅固進埽合龍將水分入



引河復歸故道欽此

乾隆十八年二月二十三日內閣奉

上諭緣河隄埵內為河身要地本不應令民居居住向因地方官不能查禁即有無知愚民狃於目前便利聚廬播種罔恤日久漂溺之患曩歲朕閱視永定河工目擊情形因飭有司出示曉諭并官給遷移價值閱今數年於茲朕此次巡視見居民村莊仍多有佔住河身者或因其中積成高阜處所可禦暴漲小民安

土重遷不願遠徙而將來或至日漸增益於經流有礙不可不嚴立限制著該督方觀承將現在隄內村民人等已經遷移戶口房屋若干其不願遷移之戶口房屋若干確查實數詳悉奏聞於南北兩岸刊立石碑并嚴行通飭如此後村莊烟戶較現在奏明勒碑之數稍有加增即屬該地方官不能實力奉行一經查出定行嚴加治罪特諭欽此

乾隆十九年六月十三日奉

上諭方觀承奏本月初七日永定河水盛漲隨飭將舊河身內穿隄引河頭開放分流北注工程均各平穩再河身內舊有董家務惠元莊居民瓦土草房悉被淹淤懇量為賞給每戶倉穀一石等語穿隄引河惟藉分減盛漲此次開放自因水勢陡漲一時難以宣洩但祇可偶一行之今盛漲既消即仍應堅固堵閉令大溜由南隄行走方為妥協至董家務惠元莊二處居民從前屢經曉諭雖伊等不願遷移亦彼時經

理各員未能周妥因循貽害此番既被淹浸宜乘此時給予搬移之資務令遷徙隄外若有仍行廬處河身藉稱不願遷徙者將來惟該督是問著將穿隄引河於何日堵閉董家務等處居民如何遷移之處仍具摺奏聞至所請每戶賞給倉穀一石著准其賞給  
欽此

乾隆十九年六月十八日奉

上諭方觀承奏永定河下口南埝以內武清縣屬之王

慶坨東沽港二村其窪處被淹者現有九百四十餘戶此等居民例無賑恤但此次被水較甚可否恩准借給口糧等語隄內居民屢經傳諭該督令其遷移但王慶坨東沽港二村人民稠密且有苦蓋瓦房歷有年所雖不能遷徙亦應有所界限不可再令附村人民占居河地其猝經被水之戶情堪憫惻著加恩令該督按戶查明借給米糧以資接濟至隄內零星各戶不過草土房間原非必不可徙該督務遵前旨

逐一查明於此次被水給予搬移之資令其遷移隄外不得姑息欽此

乾隆二十四年閏六月十二日内閣奉

上諭據方觀承奏各屬屢次大雨之後唐河沙河白溝拒馬諸水同時並漲下游悉歸淀內以致大清河尾閘不能宣洩轉由鳳河倒漾阻遏渾流而宣化上游雨後漲發空涌旁溢南岸四工隄頂漫開數丈現在馳往確勘等語入夏以來直屬大雨時行各河漲發

而山西上游諸路亦均得透雨山水下注永定河隄  
埝致有漫衝著派安泰赫爾景額即速馳驛前往看  
視情形並留赫爾景額在彼協同該督將漫口刻日  
堵築毋致再有侵溢其水過村莊現在有無淹浸及  
應行加恩撫恤之處著方觀承一面勘明妥辦一面  
奏聞該督職司河道不能先事預防著交部照例察  
議其疎防之河道各員俟查叅到日一併交部察議  
欽此

乾隆三十二年四月十七日奉

上諭前因閱視河淀情形見鳳河有斷流之處於回鑾駐驛南苑時令查勘上游疏濬以達河流今據阿里衮等查奏國河下游即為鳳河一畝泉下游即歸張家灣運河俱應行開挖深通已有旨給發帑金及時修濬矣但此二河下游皆係地方官應行經理之事聞其中亦不無淤淺阻塞今上游既議修治而下游若仍聽其淤梗是尾閭不能暢達即疏濬水源亦屬



無益著傳諭方觀承即派委明習妥員前往查勘將應行開挑之處及時興工務使一律暢流以資宣洩仍將勘估情形據實覆奏欽此

乾隆三十六年十月十二日奉

上諭本日據高晉等奏陳家道口漫工已於十月初七日合龍高晉於初九日自工次起身北上已批諭令其順路先勘南運河北運河而來昨楊廷璋曾面奏差人在景州一帶探聽高晉來信會同查勘今既先

勘南運河自應在德州取齊於路為順至周元理於  
直省河務亦稱熟悉東省現在又無應辦要務該撫  
或帶印公出或將撫篆交藩司海成護理即至德州  
與高晉楊廷璋相會協同查勘南運河至天津即同  
往勘永定河如計算時日尚寬仍可將北運河一併  
查勘竣事再行來京總以十一月十七八等日到此  
未遲如永定河勘畢為期已緊則北運河不妨暫緩  
俟

慶典禮成再行前往可即將此傳諭高晉楊廷璋周元理  
彼此訂定日期會同妥辦再南運河一帶春間曾派  
令裘曰修同楊廷璋等會辦而永定河北運河工程  
前諭高晉時亦有令裘曰修同往查勘之旨今裘曰  
修現在近畿董查疏消積水著傳諭裘曰修亦前往  
迎晤高晉等一體會勘欽此

乾隆三十六年十二月二十六日內閣奉

上諭據高晉裘曰修周元理等查勘永定河南北運河

各工事竣來京復命將應行疏築事宜詳晰議奏已  
依議行矣至所稱估需工銀四十九萬六千餘兩現  
在直隸藩庫無款可動請勅部撥發濟用等語此項  
工程關係緊要著戶部即於部庫內撥銀五十萬兩  
令周元理即日委員赴領以便及時鳩工興築該部  
遵諭速行欽此

乾隆三十七年六月十八日内閣奉

上諭袁曰修奏驗收永定河工程一摺并除近水居民

與水爭地之弊據稱淀泊所以瀦水乃水退一尺則  
佔種一尺既報陞課則呈請築埝有司見不及遠以  
為糧地自當防護隄埝直插水中被淹更甚請勅所  
司一切淀泊毋許報壑陞課並不得橫加隄埝等語  
所見甚是淀泊利在寬深其旁間有淤地不過水小  
時偶然涸出水至仍當讓之於水方足以暢蕩漾而  
資瀦蓄非若河海沙洲東坍西漲聽民循利報壑者  
可比乃瀕水愚民惟貪淤地之肥潤佔壑效尤不知

所佔之地日益增則蓄水之區日益減每遇潦漲水無所容甚至漫溢為患在閭閻獲利有限而於河務關係匪輕其利害大小較然可見是以屢經降旨飭諭冀有司實力辦理今裘曰修既有此奏是地方官前此奉行不過具文塞責且不獨直隸為然也即浙江西湖葑地居民佔者亦多前日雖曾申禁恐與直隸之玩忽大畧相同而他省濱臨河湖地面類此者諒亦不少此等佔壑陞課之地一望可知存其已往

杜其將來無難力為防遏何漫不經意若此著通諭  
各督撫凡有此等瀕水地面除已墾者姑免追禁外  
嗣後務須明切曉諭毋許復行佔耕違者治罪若不  
實心經理一經發覺惟該督撫是問欽此

乾隆三十七年十二月初八日奉

上諭永定河下口自康熙年間築隄之始原就南岸雍  
正年間因河身漸淤改由北岸近自乾隆癸酉間又  
改從水窖南出兩河之間是以康熙年間之北隄轉

為南隄雍正年間之南隄轉為北隄嗣後節次興工  
修治地勢屢更是冰窖之故道又已不免今昔異形  
著傳諭周元理將康熙年間初次築隄沿至於今中  
間改移地名次數並議改緣由詳細確查列一簡明  
清單即行附摺奏聞欽此

乾隆三十八年三月初三日督臣周元理面奉  
上諭兩岸隄裡近河之隄根以及軟灘之上應多種巨  
羅柳枝欽此



乾隆三十八年三月二十日直隸總督周元理面  
奉

上諭調和頭改條河頭其北岸之越捻改為北隄即承  
北岸六工將上中下三汎依次改為七八九工南捻  
改為南隄其三汎亦改為七八九工欽此

乾隆三十八年六月初二日奉

上諭口外自五月二十一二等日雨後灤河及潮白等  
河水俱驟長連日熱河雨覺稍稠聞灤河水勢復大

畿輔一帶雨水情形大略相仿未審永定河今年水勢如何是否不致盛長河流能否循赴中泓甚為注念著傳諭周元理即速查明據實覆奏至該處設立浚船以供濬刷淤沙之用春間親臨閱視時見船艤河中尚未覩有成效彼時即曾諭及如果實力淘浚使中泓沙不停淤於河防不無小補若徒視為具文自難冀其得益添設浚船一事原出自裴曰修之意彼身若在自必加意董辦不虞廢弛今裴曰修已故

恐滿保等未必復肯認真董辦徒有浚船之名而無  
挑濬之實則是虛糜工帑製造豈不可惜永定河原  
係周元理專責而浚船之事周元理亦同會奏著周  
元理留心督辦毋任作輟因循致成虛設仍將現在  
辦理情形若何一併覆奏欽此

乾隆三十八年六月初九日內閣奉

上諭周元理奏五月二十二日以來永定河水勢雖有  
增長大溜直走中泓迅趨下口兩岸隄工穩固一摺

覽奏稍慰厯念至所稱各處河水旋長旋消初一日  
辰刻金門開過水六寸巳時即已斷流等語金門開  
宣洩永定河盛漲其形與南河之毛城鋪相似永定  
河挾沙而行與黃河水性亦同向來毛城鋪於過水  
後即將口門及河流去路隨時疏濬以免淤停實為  
利導良法金門開自當仿而行之著傳諭周元理督  
飭河員於金門開過水之處即為挑濬務使積淤盡  
除水道暢行以資疏洩嗣後金門開每遇過水永遠

照此辦理仍將永定河長落情形隨時奏聞欽此

乾隆四十年八月十八日內閣奉

上諭周元理奏永定河歲搶修等工請仍循舊例一摺  
因乾隆三十八年報銷疏濬搶修等工銀兩工部以  
所報之數與尚書裘曰修議定大工章程案內較有  
浮多駁令刪減周元理復將歷來通融辦理緣由據  
實聲明籲請仍舊朕閱此案工部之駁固屬照例而  
周元理之請自亦實情今朕為之準酌折衷所有此

案動用工程銀兩仍准其照舊報銷不必復行駁減  
惟是永定河歲搶修疏濬等工每年定額三萬四千  
兩並准節年通融辦理不逾此數雖若示以限制實  
聽儘數開銷未為允協夫永定河水勢靡常工程亦  
因而增減即如歲修一項水大之年粘補必多水小  
之年費用較省此理之一定者又如搶修量工之平  
險疏濬視淤之淺深亦難繩以一律若如向時所定  
籠統發銀不問工之鉅細多寡任其牽勻銷算則與

庀人攬辦筵席何異殊非核實辦工之道治河所以  
衛民果屬緊要工程於閭閻實有裨益經費原所不  
靳若永定舊例未妥以致每年浮耗久之不但用涉  
虛糜且恐工無實濟何如隨時確核實用實銷之為  
愈乎除業經辦過工程事屬已往毋庸另議外嗣後  
應如何刪去舊額核實辦理酌定章程之處著軍機  
大臣會同周元理悉心妥議具奏欽此

乾隆四十年閏十月初四日奉

上諭吳嗣爵題歲報河道錢糧一疏尚係乾隆三十七年分動支收存之數辦理太遲河道錢糧等項例應按年造報原欲周知一歲河道工程之多寡鉅細以憑核實稽查即云俟各司道陸續造送查核需時則三十七年之案亦應在三十九年正月出本斷無查辦不及之理今遲至四十年冬間具題中間幾閱三載實屬遲延吳嗣爵著交部議處嗣後河工歲報錢糧俱著次年全數查明於第三年正月開印後具題



如有逾期該部即查明叅奏欽此

乾隆四十五年八月十一日奉

上諭據袁守侗奏永定河漫口督率道廳等趕緊堵築  
加工下埽該道蘭第錫等駐工趕辦不遺餘力於初  
九日酉刻合龍等語今夏永定河因上游漲盛致隄  
工漫溢文武各員本有應得疎防處分今該督袁守  
侗於一月內督率道廳趕緊堵築尅期合龍其辦理  
迅速亦應甄叙所有在工員弁功過各不相掩著加

恩仍行交部議叙以示分別懲並行不悖之至意  
欽此

乾隆四十六年十二月二十日奉

上諭本日據大學士九卿等會議黃河水勢情形一摺  
已依議行矣內胡季堂所稱河灘地畝盡皆耕種麥  
苗並多居民村落一遇水發之時勢必築圍打壩填  
塞自多是河身多一村莊即水勢少一分容納請勅  
下河南山東江南各省督撫確查令其拆去遷居隄

外等語所見甚是河灘地畝居民日就耕種漸成村落一遇水勢增長自必築牆疊壩填塞河身此弊由來已非一日最宜嚴禁從前朕閱永定河隄即見有民人在彼耕種居住者特諭方觀承令其嗣後嚴行禁止勿使增益彼時聞南河亦有此弊曾於閱永定河隄示方觀承詩內再三諄訓今河南山東等省聚居河灘者村莊稠密更非永定河可比若聽其居住墾種於河道甚有關係著傳諭薩載等即行確加履

勘其隄外地處高阜無礙河身者自不妨聽其照常  
居住耕種若隄內地方不便佔居填塞有礙水道所  
有村莊房舍該督撫等務須嚴切曉諭令其陸續遷  
移徙居隄外俾河身空濶足資容納仍須遴委幹員  
不動聲色妥為經理使遷徙貧民毋致擾動失業方  
為盡善著將此傳諭薩載等並諭阿桂英廉知之欽  
此

乾隆四十七年正月二十五日内閣奉

上諭前據胡季堂奏黃河淤出地畝多居民村落並皆耕種麥苗一遇水發勢必築圍打壩填塞自多且河身多一村莊即水勢少一分容納請勅下河南山東江南各督撫令其遷居隄外等語河灘地畝居民開懇日久必致填塞河身於水道甚有關係且居民廬舍佔據灘地猝遇水漲之時勢必淹浸於民居亦多未便因特降諭旨令薩載等確加履勘其隄外地居仍阜者仍聽照常居住耕種若佔居隄內於水道有

礙即行明切曉諭俾陸續遷徙并令該督撫等妥為  
經理毋致貧民失業昨已據韓鐸覆奏遵照籌辦自  
應如所奏即行遷徙但此事當為之以漸持之以久  
因思灘地居民墾地結廬已非一日小民自謀生計  
亦必非當沖刷之灘聚居墾種若偶然河徙沖刷是  
伊自取即水退亦不可復令居住若其目前無事安  
居已久不免安土重遷且河隄以外均屬民田亦無  
隙地可以遷徙所有舊居隄內灘地無礙河身者民

人已經築室墾種仍加恩准其各守舊業毋庸押令  
移居以副朕厯念窮黎之意至此後河南山東江南  
直隸等省凡遇潁河隄內灘地該督撫河臣等必當  
嚴加查禁毋許再行居住佔種如有仍前侵佔灘地  
阻遏水道者惟該督撫河臣等是問將此通諭知之  
欽此

乾隆五十二年十一月二十九日奉

上諭直隸永定河隄工朕於庚午乙亥年間曾經親臨

閱視明春巡幸天津亦當順道經臨但該處隄岸工程近年以來是否穩固之處著劉綬詳細查明具奏並將該處隄工情形開具略節繪圖呈覽所有庚午乙亥御製詩並著抄寄閱看將此諭令知之欽此



宸章紀

碑文 記

詩

匾

聯

聖祖仁皇帝御製文

盧溝橋碑文

康熙八年十一月二十七日

朕惟國家定鼎於燕山河拱衛桑乾之水發源於大同  
府之天池伏流馬邑自西山建瓴而下環繞畿南流通  
於海此萬國朝宗要津也自金明昌年間盧溝建橋伊  
始歷元與明屢潰屢修朕御極之七年歲在戊申秋霖  
泛溢橋之東北水啣而圯者十有二丈所司奏聞乃命

工部侍郎羅多等鳩工督造挑濬以疏水勢復架木以  
通行人然後庀石為梁整頓如舊自此萬國梯航及民  
間之往來者咸不病涉實藉河伯之靈丕慰通濟之懷  
蓋萬世永賴焉爰勒豐碑用垂不朽

永定河神廟碑文

康熙三十七年十二月十六日

朕勞心萬民於農田水利諸務常切講求大要仿古之  
決河浚川而因勢利導度有可行期於必濟惟動丕應  
樂觀厥成念茲永定河其初也無定蓋緣所從來也遠

發源太原之天池經朔州馬邑會鴈雲諸水過懷來夾  
山而下至都城南土疏衝激數徙善潰頗壞田廬為吾  
民患苦朕甚憇之蜀賑雖頻告舊如故永圖捍禦之策  
咨度疏濬之方特命撫臣于成龍董司厥事庀役量材  
發帑諏日具告於神乃率作方興庶民子來畚鍤雲集  
湯湯之水湍波有歸橫流遂偃嘉此新河既瀦既平計  
地自宛平之盧溝橋至永清之朱家莊漚郎城河注西  
沽以入於海計里延袤二百有餘廣十有五丈計工始

於康熙三十七年三月辛丑即工於五月己亥自今蓄  
洩交資高卑並序民居安集亦克有秋夫豈人力是為  
抑亦神庥是賴宜永有秩於茲土以福吾民用是錫河  
名曰永定封為河神新廟奕奕丹雘崇飾更頒翰墨大  
書匾額以答神貺豈特於祈報之典有加尚俾知水利  
有必可興水患有必當去而勤於民事神必相之以勸  
我長吏凡一渠一堰咸當盡心爰揭諸碑紀茲實事監  
於後人視永定河所自始

世宗憲皇帝御製文

石景山惠濟廟碑文

雍正十年四月

永定河古所稱桑乾河出太原經馬邑合鴈雲諸水奔  
注畿南發源既高滙流甚衆厥性激湍數徙善潰康熙  
三十七年我

皇考聖祖仁皇帝親臨指授疏導之方新河既瀦遂慶安  
瀾爰錫嘉名永昭底定立廟盧溝橋南題額建碑奎文  
炳耀河神之封實自此始朕續紹洪基加意河務設官

發帑深籌疏築之宜比年以來永定河安流順軌無衝  
蕩之虞民居樂業歲獲有秋豈惟人事之克修實賴神  
功之贊佑念石景山據河上游捍禦宜亟爰命相擇善  
地作新廟以妥神朕弟和碩怡親王躬往營治度地麗  
村之西鼎建斯廟長河西統而南紫峰嶺北紆而左鶩  
控制形勝負山臨流殿宇崇嚴規制宏敞護以佛閣界  
以繚垣經始於雍正七年役竣復以盧溝橋神廟。

皇考聖蹟所在再加崇飾丹雘維新並增建傑閣翼如煥

如稱朕敬神惠民之意爰賜廟名曰惠濟勒文貞珉以紀其事詩稱懷柔百神及河喬嶽河之有神備載祀典況永定為畿輔之名川靈應夙著田疇廬舍繡錯郊圻其得安耕鑿而樂盈寧者胥荷

皇考方略昭垂而神明顯靈默相孚佑蒸黎邀福孔多宜加崇敬今茲數十里內廟貌相望虔修秩祀尚其妥侑歆饗俾斯民康阜乂安以宏我國家無疆之慶豈惟朕承茲惠貺我

皇考平成之駿烈實嘉賴焉

皇上御製文 記

安流廣惠永定河神廟碑文

乾隆十六年十一月十一日

國家懷柔百神嶽瀆海鎮而外名山大川之祭視歷代  
為加隆矧郊圻近甸洪流巨浸經行迄於千里利賴存  
於萬姓昭德報功曷敢弗欽崇厥祀永定河古桑乾河  
也發源天池伏流馬邑匯雲中鴈門諸水穿西山而注  
盧溝亦曰盧溝河西山而上岡巒夾峙無衝激之患盧



溝而下地平土疏波激湍悍或分或合遷徙弗常而固  
安霸州之間輒至潰溢我

皇祖聖祖仁皇帝親臨指示大修隄堰肇錫嘉名我

皇考世宗憲皇帝興舉水利疏濬兼施蓋自康熙三十七  
年至今永慶安瀾民資作乂平成底定之績邁越前古  
而神庥協應靈貺屢彰已五十年於茲矣康熙雍正間  
盧溝石景均建有龍王之廟而神宇之嘉稱未定朕纘  
膺鴻緒躬閱河防仰惟謨烈之顯承敬念明神之孚佑

深籌捍禦之宜備舉尊崇之典爰勅督臣式輪式真新  
定斯名平野臨其前長河繞其側堂基爽塏棟宇宏深  
禮臣請勒文貞珉以紀歲月朕惟詩曰允猶翕河又曰  
世德作求永言配命惟永定河之順軌經兩朝之方略  
翕猶之功既著世德之盛彌昭今茲廟貌維新以妥以  
侑既薦明德之馨彌深紹庭之念神其益懋豐功降康  
兆庶俾三輔之內廬井恬熙咸安作息以慰朕懷保萬  
民之意以宏我國家無疆之慶將億萬斯年實嘉賴焉

閱永定河記

乾隆三十八年三月

永定河之本無定也此氣數之可以授其權於人事者也無定河之求永定也此人事之不可以諉其權於氣數者也自前歲夏秋瀕河田廬被潦特命高晉襄曰修周元理等會勘利病所由發帑五十餘萬金大加疏築決歲訖功農臻倍稔遂俞所請以今春省成事而詔之曰河之工茲式集矣雖然朕能遽信為一勞永逸計乎昔之河故無工也惟我

皇祖聖祖仁皇帝蒿目民艱為畿甸東南勤求保惠之政  
莫若興建隄工溯自康熙三十七年始事迄今億兆蒙  
休淪浹肌髓中間偶值水旱不齊此溢彼淤遷流遞易  
自安瀾城而柳岔口而王慶坨而冰窖草壩而賀老營  
而今之條河頭或北或復南凡六徙皆審時度勢善為  
相導惟務順小變以歸大常而於

成規固敢稍敷斯誠

皇考世宗憲皇帝以暨朕躬數十年來繼

志繩

武之苦心不容自己者何者在河固無一勞永逸之方在  
治河實有後樂先憂之責也或者耳食漢田蚡天事非  
人力及晉杜預請決諸陂之庸見謂棄地與水可聽無  
定者之所之嘻何其戾耶夫以水故棄地猶可若以地  
故棄人可乎子輿氏稱神禹行所無事無事而曰行則  
必有無事之事所為疏濬決排者非耶以黃河證之積  
石龍門故蹟可按而商患五遷周移千乘即已世近而

事殊厥後赴海南趨殆更燕齊與吳之境雖神禹復生亦難力挽以從其朔第更一境即治一境乃與當年導源之績等耳豈竟以不治治之耶桑乾流經近圻勢若建瓴非挾沙將一洩而無餘惟挾沙又四出而莫遏運道民生無隄何賴前此督臣孫嘉淦建議開金門閘上游中亭河遂不能容所至村莊漫溢幸急飭堵閉民獲安居尤近事之足為炯戒者且朕非直為愛護已成之工起見也假令是河在今日尚無隄工而籌運道策民

生朕亦必自為始事之舉易地以觀益知我

皇祖

皇考默鑒今日之發帑疏築有

深許為後

先克紹者矣不然者惡勞惜費朕寧必大矯乎人情而甘為是汲汲也哉是行也往復周諮既嘉大吏能體朕意猶慮其不克堅持定識勉繼前功爰特揭大旨鍤之河上其他條具規制存乎神而明之者皆不書

重葺盧溝橋記

乾隆五十一年二月

文有視若同而義則殊者不可不覈其義而辨之也余既覈歸順歸降之殊於土爾扈特之記辨之矣若今盧溝橋之重修重葺之異亦有不可不覈其義而辨之者蓋今之盧溝橋實重葺非重修也夫修者傾圯已甚自其基以造其極莫不整飾之厥費大至於葺則不過補偏苦弊而已厥費小夫盧溝橋體大矣未修之年亦久矣而謂之葺補費小者何則實有故蓋盧溝橋建於金



明昌年間自元迄明以至國朝蓋幾經葺之矣自雍正十年逮今又將六十年帝京都會往來車馬雜遝石面不能不弊壞行旅以為艱而橋之洞門間聞有鼓裂所

謂網兜者

謂下垂也

司事之人有欲拆其洞門而改築者以

為非此不能堅固爰命先拆去石面以觀其洞門之堅固與否既拆石面則洞門之形畢露石工鱗砌錮以鐵釘堅固莫比雖欲拆而改築實不易拆且既拆亦必不能如其舊之堅固也因祇令重葺新石面復舊觀而橋

之東西兩陞接平地者命取坡就長以便重車之行不致陡然顛仆以搖震洞門之石工而已朕因是思之渾流巨浪勢不可當是橋經數百年而弗動非古人用意精而建基固則此橋必不能至今存然非拆其表而觀其裏亦不能知古人措意之精用工之細如是其極也夫以屹如石壁之工拆而重築既費人力又毀成功何如仍舊貫乎則知自前明以及我朝皆重葺橋面而已非重修橋身也即康熙戊申所稱水啣橋之東北而圯

者亦謂橋東北陞之石隄而已非橋身也以是推之則知歷來之葺或石面或橋陞之隄胥非其本身洞門可知矣夫金時鉅工至今屹立而人不知或且司工之人張大其事圖有所侵冒於其間焉則吾之此記不得不揚其舊過去之善而防其新將來之弊是為記以詳論之

聖祖仁皇帝御製詩

駐蹕石景山

駐蹕荒亭日欲斜  
潺湲石溜滴雲霞  
驚旗飄動連香草  
龍騎駢驂映野花  
巖洞幽深無鳥跡  
峯崖高處有人家  
青山綠水誰能識  
懷古登臨翫物華

石景山東望

車書混一業無窮  
井邑山川今古同  
地鎮陵增標秀異  
鳳城遙在白雲中

石景山望渾河

石景遙連漢渾河  
似帶流滄波  
日滾滾浩淼接皇州

察永定河

康熙四十年十一月

源從自馬邑溜轉入桑乾渾流推濁浪平野變沙灘廿載為民害一時奏效難豈辭宵旰苦須治此河安

閼河長歌

有序 康熙五十五年

朕閼河出郊自南苑過盧溝順永定河之南岸見十五年  
前泥村水鄉捕魚蝦而度生者今起為高屋新  
宇種穀黍而有食矣水淀改成沃野流沙變為美田  
因思古人云有治人無治法斯言信哉若治之不早

民至於今未知何似也故有感而作長歌一篇以示  
善後之計云爾

春風春社艷陽天雪盡塵清徧路阡曾記當時泊舟處  
今成沃土及膏田十年之前汎黃水民生困苦少人烟  
歷歷實情親目睹老轉少徙益難撫挾男抱女走馬前  
皆云此河不可堵桑乾馬邑雖發源山中諸流數難數  
吾想畿內不能防何況遠治淮與黃數巡高下南北岸  
方知渾流為民傷春末無水沙自漲雨多散漫遍汪洋

若非動衆勞人力，黎庶無田漸乏食。廟謨不惜費帑金，  
救民每歲受饑溺。開河端在辨高低，隄岸遠近有準則。  
未終二年永定成，泥沙黃流直南傾。萬姓方蘓，愁心解。  
從此鄉村祝太平，昔日宵旰嘗縈慮。將來善後勿紛更。

### 舟中觀耕種

四野春耕阡陌安，徐牽密纜望河干。土肥原係黃沙過，  
永定河泛溢之際，遍地黃水。自治河之後，得以耕種。辛苦先年挽異瀾。

### 曉發盧溝

有閨春深淑景遲長橋水泮未流漸徘徊風景思疇昔  
千里金隄保舊規

閱永定河隄

有序

康熙四十年永定河告成至今十六載隄岸堅固並  
無氾濫去歲山水驟長幾不能保所以春幸回鑒便  
道察閱方知昔年修築有益於民生永保安瀾矣故  
賦七言近體以記其事

豫定安瀾在事前每逢雨潦自心牽帑金不惜籌耕種



膏土惟思廣陌阡隄老失防愁剝蝕岸堅長護幸安全  
肩輿頻視桃花水滾滾渾波通碧連

皇上御製詩

永定河云有故道由中亭玉帶以達津歸海總督孫  
嘉淦建議疏復及時興作覽奏水已循軌民情懽躍

爰成一律

乾隆五年秋

永定原無定千年衛帝京有源安可障無事自然行玉  
帶清流合中亭故道并祇台恒自凜宵旰望平成

過盧溝橋

乾隆九年正月二十五日

滑笏新波泛薄凌春山翳鬱有雲興無邊詩景盧溝道  
半拂吟鞭憶我曾

馮輿歷歷好韶光麥始攢青柳欲黃只有憂懷同渴壤  
幾時一例沃天漿

過盧溝橋

乾隆十一年九月

薄霧輕霜湊凜秋行旌復此度盧溝感深風木睽逾歲

望切

鼎湖魏易州曉月蒼涼誰逸句渾流紫帶自滄洲西成景  
象今年好又見芄芄滿綠疇

盧溝橋

乾隆十三年二月

長虹亘渾河石欄接芳埒東風已解凍洪波流決決聒  
耳松泛濤奪目花飛雪計偕指日來曉月應聯轡別足  
志孰甘點額中紛熱驅車幾度過興會一番別

盧溝橋

乾隆十三年八月

秋深原減漲潦盡未澄波直接滄溟月橫陳永定河往

來常歲屢感慨此番多回首石欄畔傷心春仲過

今春幸山

東亦經此  
橋有詠

過盧溝橋

乾隆十四年二月

石橋鴈齒度盧溝兩岸來年綠正稠  
風裏荻蒲颭遠淑  
春來鷗鷺滿橫洲閒心無那悲懽緒  
野水依然左右流  
東去直教滄海遠誰能一葉放扁舟

盧溝橋

乾隆十五年二月

春光罨幘車春水樂鳶魚冰先

去聲

桃花解波含柳色如

堯峯明積素甫野潤新畬絕勝常年景詩成慶慰餘

趙北口水圍罷登陸之作

三日舟園足悅心歸途六轡聽如琴河防要欲籌疏濬

永定河下流覺於允督臣之請親臨視之以商疏濬之策民瘼還因便酌斟平野新

看麥苗長環隄背指柳烟深風光此處留餘興吳越明年待暢吟

過永定河作

取道開河千浮橋度廣灘汎凌過竹箭水潦未桑乾四

載由來仰尾閭今度者

適以下口應籌疏濬故度河迂道閘之

敬繩

仁祖志

永定河自始為隄障之而賜

皇祖時今名

永定冀安瀾

閱永定河隄因示直隸總督方觀承

水由地中行行其所無事要以禹為師禹貢無隄字後世乃反諸祇惟隄是貴無隄免衝決有隄勞防備若禹豈不易今古實異勢上古田廬稀不與水爭利今則尺寸爭安得如許地為隄已末策中又有等次上者禦其漲歸槽則不治下則卑加高隄高河亦至譬之築寬牆

於上置溝渠

叶

行險以徼幸幾何其不清胡不籌疏濬

功半費不貲

叶

因之日遷延愈久愈難試兩日閱永定

大率病在是

叶

無已相諮詢為補偏救弊下口畧更移

取其趨下易培厚或可為加高汝切忌多為減水壩亦

可殺漲異取土於河心即寓疏淤義

向來河臣治隄率以加高培厚為請

朕以培厚尚可加高則隄高而河亦日與俱高非長策也其培隄取土類取之隄外朕謂就近取隄外之上以

益隄隄增而地愈下宜取河中淤出新土用之則培隄即寓濬淤之義似為兩得

河中有居民

究非長久計相安姑勿論宜禁新添寄

河中淤地窮民輒就播種構草

舍以居水至則避去雖不為害而築牆叠壩未免有填河之患祇以遷徙非民所願不得已姑聽之而禁其後勿附益

增廓云條理爾其覆大端吾畧示桑乾豈巨流束手煩計議隱隱聞南河與此無二致未臨先懷憂永言識吾意

迴鑾作

臺麓祝釐雖素志淀池試獵偶乘閒此行正務因河道兩日詳觀歷柳灣無作聰明隨水性惟懷惻隱厓民艱駢駢四牡催歸轡南苑春光指顧間



喜晴

霖雨頻淫沾黍稻均怒長時若正宜暘通日晴未放  
永定遭漫溢賑救不惜帑築隄始安瀾南望縈愁想癡  
雲漸露空朱日旋騰朗豁然天宇開吾心與俱廣

望晴

喜晴纔六日愁霖復連朝憶昨從香山夾道看良苗便  
雨未為害況復滋新蕎云何腸展轉不解予煩焦所慮  
在永定漫隄築未牢此時不放晴盛漲何時消哀哉固

邑民風雨所漂搖賑卹詔屢頒補救心頻勞萬戶苟失  
安九重豈足驕晚來西北風浮雲碎欲飄簷喜乾鵲鳴  
池飲官蛙蠶宜賜願及時南望心神翹

過盧溝橋

乾隆十五年八月

石橋跨渾波堅久誰所製過此為桑乾古以不治治築  
隄詎得已

皇祖為民計經世未疏濬疏濬勞不易加以沙性淤騎牆  
行必致令春清苑迴臨隄一親視叶束手苦乏策無已

示大意入夏霖雨溢遂告隄云潰南望彌感憂阡陌成  
棄置賑卹豈有各排築籌次第秋分潦勢殺狂瀾底由  
地徒懷瓠子歌實遜塗山義

盧溝橋

乾隆十六年正月

石橋卧凍波來往行人渡乘時每斷流狂瀾歸何處去  
歲決畿南至今困沮洳固愧人力為詎云委諸數疏濬  
付河臣古今重防護

久聞

乾隆十六年 初秋

久聞黃河尾漸淤審然民瘼亟宜慮去歲春月越永定  
騎牆行水吁可懼不啻尾淤河半淤夏霖隄潰果旁驚  
泛溢空懷瓠子歌至今未涸憐沮如爾時南望增戚憂  
未識金隄何以護茲來兩度剪黃流水由地中直東注  
迴幹奔騰勢雄放雲梯達海須更赴盛漲云或時拍岸  
要亦歸川得其故人言紛紜難盡信解疑要在目親覩  
叶  
因思永定原無尾不疏則淤理所固九曲源從天上  
來宋元以後奪淮據

古之黃河在齊冀為歸墟自宋元以後漸南徙奪淮水之路並行入

海云齊驅赴壑有歸墟葦蕩寬深延套巨自雲梯閣以下葦蕩延袤南岸

萬十巨北岸為十套而清口淮水暢流會黃東注趨海之勢既專攻沙之力益勁矣迴異渾流善

變更去歲過憂今始悟去歲聞永定有未臨先懷憂之句

盧溝曉月乾隆十六年九月

茅店寒雞呶嗶鳴曙光斜漢欲參橫半鈎留照三秋淡

一蟫分波夾鏡明入定衲僧心共印懷程客子影猶驚

通來每踏溝西道觸景那忘黯爾情易州建陵往來必由之道

過盧溝橋

颯景石橋頭愴人是凜秋

丹邱瞻玉劍黑水渡沙溝波幸今年靖民蘇昨夏憂導川  
懷

聖蹟永定賴貽謀

過盧溝橋

乾隆十八年二月

石梁黑水此鳴鞭前度回思正隔年西指

橋山程四日繫子心在嶺雲邊

驚蟄初臨凌汎過層冰浦淑積嵯峨俯欄識得渾流猛

行水思量究若何

閼隄前歲嘆行牆瓠子遺歌怒若傷

庚午春閼永定河隄知其每歲加高

河底淤填如以牆東水是夏渾河決溢因命改藩下口

南徙尾閼賴稍定亦惟茲

土慎修防

無定何如永定乎千秋疏治仰

神謨便將紆轡觀輸尾稽事民生總要圖

將取路霸州視永定河恭送

皇太后車駕之作

水獵博

慈歡春池極暢觀又將遵甸陸為復閱桑乾簡衆清前蹕  
歸途奉

大安吉祥雲擁處直北帝都看

乘舟觀永定河下口之作

夜雪忽已收朝霧未云斂策馬遙隄永定全勢覽下  
口欲其暢渾流利泛濫前者歎行牆一綫奚歸坎無已  
籌下策讓地稍避險中處徙流移向南聽如漸

乾隆十  
五年春



閩永定河以下口宜畧更移今其易於趨下且於流涸  
時潯中泓引河而流民占居河中淤地者亦勸導徙就  
隄外年來次第修舉下口益暢  
是取道重閩脩已三載餘矣 今來閩尾閭三歲驚茫

萬舍陸命進舟恬波春淦淦雖遜洪澤濶微山已不減  
蕩漾有餘地巨浸乃澄澹慰茲憂即茲積高車鑒儼補  
偏斯不無永逸則豈敢

### 隄上四首

有霧不妨寒裏去無花漫道霧中看

是日霧

日高旋轡澄

霧翳近墅遙村入覽寬

新浦嫩芷集駕鳬西淀毆來果信無聞道昔年行水獵  
每於近此放黃鱸

渾流千里去隄遙灘地芊芊茁綠苗疏易尾閭籌目下  
窮黎或得免漂搖

雪融膏潤麥含含馭娵春隄鏡影涵一夜跼蹐今慰念  
况看佳景似江南

癸酉二月沿隄行三十里觀永定河新移下口處  
兼示總督方觀承永定河道白鍾山

舊時北岸今南岸近舊南隄今北隄

系乾於康熙年間築隄之始原就南

雍正年以河身於故改從北近又以河身新於改從水害南出在兩河之間故康熙年之北隄為今南隄而雍正

正年之南隄為今北隄矣遷就向寬資蕩漾已看汎過積淤泥

舊識黃河利不分挾沙東注向瀛濱渾流今有清流亘

黃河全流入海其力較專至清口會淮攻沙之力益勁永定下流不能獨行入海有運河鳳河橫亘於中因散

入諸淀水過沙停故特易於此策思量未易云

新口疏通頗吸川安瀾自可保當前都來六十年三改

河自聖祖中年始築隄修防賜名永定六十年間已南北三改矣長此經行正未然

給資撥地遷村墅讓水還聽一麥耕安土不難事姑息  
那知深意訓盤庚

石景山初禮惠濟廟

乾隆十八年十月

崇祠依石堰像設謁金堂雲壁瞻初度曦輪屈小陽河

防慎有自

永定河自此地始有修防以上乃萬山來流無事修防也

神佑賴無疆疏

鑿非經禹唯厓永定方

聞永定河隄有泛溢處詩以誌懷

乾隆十九年七月

永定古桑乾蕩漾延數縣雖獲一麥收難免三伏漫制

隄以來之其初頗循岸無何淤漸高泛溢乃頻見下口  
凡屢更揚沸豈長筭今夏雨略多盈壑致旁灌或云聽  
其然功倍於事半試看無隄初何無衝決患近是究難  
從哀哉彼饑游

過盧溝橋

乾隆二十年二月

盧溝橋北無河患盧溝橋南河患頻橋北隄防本不事  
橋南築隄高嶙峋隄長上聲下同河亦隨之長行水牆上徒  
勞人我欲棄地使讓水安得餘地置彼民或云地亦不

必讓但棄隄防水自循言之似易行不易今古異宜難具論

閱永定河

乾隆二十年

永定河古所稱一水一麥之地康熙三十七年始事築隄而下流入淀挾沙易淤故下口數徙康熙年間由柳岔口雍正年間由三角淀近年改由冰窖今復漸淤總督方觀承建議移下口於北隄之東因親臨視詩以紀之

永定本無定竹箭激濁湍長流來塞外兩山束其間挾沙下且駛不致為災患一過盧溝橋平行漸就寬散漫任所流停沙每成山其流復他徙自古稱柔乾所以疏剔方不見紀冬官一水麥雖成亦時災大田因之創築隄

聖人哀民艱行水屬之淀蕩漾歸清川其初非不佳無奈歷多年河底日以高隄牆日以穿無已改下流至今凡三遷前歲所遷口復歎門限然大吏請予視蒿目徒憂

煎我無禹之能况禹未治旃詎云其可再不過為補偏  
下口依汝移目下庶且延復古事更張尋思有所難

過盧溝橋

乾隆二十三年二月

拱極城西度石橋春風客路故相撩謁

陵指日知程近程近吾心越覺遙

汎遇桃花漲影退上流猶自易隄防北南下口屢遷就  
慚愧終無永逸方

桑乾節近歛洪波沙積川中兀已多大抵有源要求尾



小黃河劇大黃河

過盧溝橋 乾隆二十六年

今年凌汛無積冰潛融默化渾流平司事額手慶佳瑞  
斯偶然也何足稱橋上無修防亦不見遷徙橋下慎修  
防自茲多事矣卅年下口已四更無已救弊疏其尾云  
斯可以延卅年三十年後將誰諉嗚呼神禹已去幾千  
載補苴罅漏而已耳

過盧溝橋書懷 乾隆二十八年

微波春水漲沙灘詎啻春微柔且乾祇以渾流非一往  
每防夏汛有千難作隄已連騎牆勢輸尾惟圖措大安  
下口運河為之阻渾流既不可入運惟使蕩漾於淀池  
及窪地自乾隆元年以來已三易其處矣今之下口據  
方觀承以為可行二十餘年知博覽從來治河策不寧  
其非長策而實無計可圖也  
斯矣為長歎

禮北惠濟廟疊癸酉舊作韻  
乾隆二十九年二月

寺碑建雍正

皇考闡神堂清宴資垂佑實枚偁向陽不愆秩宗祀恒奠

冀州疆蒿目一勞計難言永逸方

過盧溝橋詠冰解

乾隆二十九年

水黑為盧冰亦然隆冬凍合澤腹堅東風一夜入長川  
解之祇在須臾間青氣鼓動索篙宣元英不得施其權  
層疊黝玉巨如山累而置之河兩邊其高峩峩長連延  
黃流在中瀉激湍方當初解奇可傳礚礚磳磳聲喧闐  
快馬斫陣驚擊鳶似神而非三似馬亦不衝蕩石橋堧  
信非人力斯由

天襟帶皇州億萬年

過盧溝橋 乾隆三十年

通閤遲節候河水尚未開徑行誰病涉

冰上行人往來竟似不知有河

隄防

去似虛堆

兩岸上積土成堆蓋夏秋以備不虞

因悟乘時要難言永

定該遙源溯代地西北萬山崔

過盧溝橋道中即事 乾隆三十一年

拱極城邊度石橋橋亭碑記仰

神堯錫名永定垂千古敢不修防塵旰宵

一道黃流宛在中金隄夾輔峙猶崇桃花水送層冰下

下口新河宛轉通

渾河下口屢易自己亥年方觀承奏請改由北岸大隄之外下注沙淀業

浚十餘年來河水安流兩岸  
羣國頗資新河宣洩之力

過橋村店號長新旅館居停比接鄰試問於中投宿者  
阿誰不是利名人

柳陌風前金縷縷麥塍雨後綠芊芊見耕犁者教傳問  
云近清明種大田

過盧溝橋

乾隆三十二年

津門莅旌始春仲啟鑒期又自石橋過迴思江國時渾  
流初赴壑裂凌去聲遠鋪涯層疊堆蒼玉神哉誰所為

過中亭河紀事

中亭入玉帶玉帶即清河中亭洩渾漲河窄難容多蕩

漾沙遠留至此為澄波受小不受大此理信不磨嘉淦

孫

督直時

在乾隆庚申年

謬聽人言訛謂渾河故道即此實非

他建議放乎此千村歎淪遇知誤乃改為

嘉淦議開永定南岸復渾

河故道後渾河下注浸溢田廬旋於辛酉春堵塞

民已嗟蹉跎不十不變法語

誠不我訖經過得親見

中亭河受永定金門開成派分減之水消納無多及至玉帶河

則已成清水孫嘉淦誤聽人言於金門開之上開放兩岸水由牝牛諸河下注中亭至不能容遂趨窪地村民受潦因命急堵築決口方不為患今親臨閱視益知孫嘉淦前議之謬向曾有詩紀事因詳誌而正之悔

過成新哦

過盧溝橋

乾隆三十三年

盧溝來往過多年蟬煉卧波鎮鞏然上接遥源資東刷

永定河自石景山以上兩岸並有岡壘夾峙迫過橋則皆漫流平沙是橋實為上游鎖鑰

下成巨壑

事防宣春回解凍沙猶弱東去河橫運恐穿

永定河下游為運河

橫亘所隔不能直達於海無已開寬下口資其蕩漾澄  
清然後歸歸河由直沽入海所以避運一帶工程最關  
要無奈漾流籌下口一勞永逸正難焉

過武清縣

乾隆三十六年

驅車過雖奴廣甸甚沮洳去歲夏行潦此地被災遽永

定既決隄

永定河北岸二工因去夏雨水驟漲隄口清決武清村莊被淹成災較重

北運亦

漫淤

北運河西岸漫溢武清亦被淹浸因勅大吏善為撫卹急賑大賑視他處為優今春仍降旨加賑幸

所見民無菜色且二麥廣種可望有收意為稍慰

大田普無收曷以卒歲度是

用賑濟施更勅勤宣布今來細體察老幼歡夾路庶幾



免流離未見仍屋慮秋麥亦已茁禾黍云種佈設以此  
池論懼雨宜晴煦雖然彼高田寧無望雨處

瞻謁永定河神祠

芟新非不屬隄堰聿觀成終鮮一勞策那辭五夜縈憑  
看雖曰慰追憶尚含驚舊壑原循軌新祠已麗牲連阡  
麥苗嫩圍野柳條輕慚乏安瀾術事神敢弗誠

閱永定河作

庚寅夏決口補築旋歸舊

乾隆三十五年閏五月北岸  
二工漲決特命侍郎德成會

同督辦於漫口處取直培築大堤刻日奏報合龍

辛卯秋衝隄障波俾迴溜

十三

六年應溝橋上游發水南岸頭工處漫口甚廣仍命德成會辦取直築隄亦赴期奏報合龍

長此竟

安窮是必病久受南河節相宣

高晉

中朝司空赴

修

方

伯共踏勘

周元理

窮源委以究分流盛漲洩疏淤中泓走

河之受害端在於高隄薄應通行浚治以規永固高晉素精河務同尚書奏曰修督臣周元理悉心相度自中泓達灣取直以及應疏應堵應引應洩之處發帑大加營治

發帑五十萬次第工云

就去歲幸時若安瀾慶豐收今來閘隄成仍擬下口觀

去年春工告竣歲幸報稔周覽各工實為欣慰將以回程仍視下口

既已昧幾先寧不籌

善後萬民勿言謝追思心尚疚

休哉榭三首

永定河神祠東廂地方官灑掃為憇息之所因反藪  
輟快哉亭之意名之曰休哉而系以詩

瞻拜因祈恬佑來波流浸灌近隄隈江湖廊廟心誠異  
夢得快哉我休哉

流細春波已激湍明知時節近桑乾夏秋無定亟蘄定  
蒿目一勞永逸難

渾水由來易澱淤中流因置浚船疏宋曰修周元理於永定河大工告成  
時籌辦善後事宜設浚船一百二十隻分布各工即令  
河兵以時淘濬中泓使無停淤阻溜之患今亦艤河中  
備覽如果實力行之無稍作輟不致視為具文未必無  
小補所謂有治人無治法惟在司事者董察弗懈耳  
無遑平日尚勤爾遮莫一時備覽予

### 閱金門閘作

渾河似黃河性直情乃曲順性防其情是宜機先燭而  
此尤所難下流阻海屬殺威蓄厥微在洩復在束金門  
傲毛城減漲資滲漉然彼去路遥謂毛城鋪此則去路促開下

減河自黃家河分支由津水窪達浣僅  
一百四十餘里路近勢促故沙易停淤  
鋪去路既遠且有倒勾引河使減下之水澄清緩渴故  
資宣洩之利而無他患未若此渾流直下一往莫遏也  
促者橫流速斯誠非善策驚見心粥粥亟籌救急方謂

當挑壩築

水既直下勢難驟挽命於閘上作挑水壩通其迴溜成倒勾之勢然後舒徐歸浣庶幾補

偏之一策耳

倒勾抵金門餘溜俾歸谷非不圖屢閱終弗如

親目然予試絮矩九寓廊員幅一人豈徧及滋用增惕

慙

金門閘隄柳一首

隄柳以護隄宜內不宜外內則根盤結禦浪隄弗敗外  
惟徒飾觀水至隄仍壞此理本易曉倒置尚有在而況  
其精微莫解亦奚怪經過命補植緩急或少賴治標茲  
小助探源斯豈逮

中亭河二首

中亭原是淀支流偶洩渾河水漲秋誤聽人言昔致患  
乾隆庚申朕誤聽孫嘉淦建議於金門開之上聞放南  
岸水由牝牛諸河下注中亭至不能容窪地村莊受潦  
隨於辛酉春堵塞及丁亥親臨未經親見事難籌  
閱視益知前議之謬有詩紀事

萬事都胥親見之當無暇給應去聲為遲重華明日達聰者未必勞勞日若斯

往閱永定河下口輿中作

下河南北任流遷

永定河自康熙三十七年築隄之始下口由安瀾城後因原道漸淤至三

十九年改由柳岔口雍正四年改由王慶坨乾隆十六年改由永客草壩二十年改由賀老營三十七年改由條河頭計前後遷流六度以永客草壩而論康熙間之北隄轉為南隄雍正間之南隄轉為北隄以今條河頭而論凡康熙雍正間之南北隄又均在河之南矣

壑則傷多導使宣絜矩邱明

別知懼防民之口甚防川

閱永定河下口以示表曰修周元理何燭

七十年間六度移

永定河下口初由安瀾城復改由柳出口而王慶坨而水害草埔而賀老

營及今之條河頭或北或南凡六徙

即今下口實權宜便徵盈酌虛劑者

不過補偏救弊斯燭則危輿資博採

何燭素習河務於行水機宜具有見

解茲以河南巡撫至天津迎鑒即命危隨閱視下口以資詢訪

禹之行水在無為委源

源委勘一再

此次初閱頭工二工今復視下口於全河首尾情形畧見梗概茲命表曰修周元理

何燭三人由此尋流而上查至頭工沿河再加講求

酌具議以聞同事諸人共勗其

暮春啟蹕恭謁



秦陵順途先閱永定河前歲所築缺口仍以迴鑿之便遂

奉

皇太后安輿歷覽淀池運河諸工及永定河下口詩以誌

事

有序 乾隆三十八年

神臬連右塞

軒邱勤薦醕之思沃壤控東瀛禹甸課剔鬣之效維桑落  
流經采衛詎辭稅駕咨謀而析津景屬水鄉宜奉

安艫清勝疆吏達封章於郵匭云畿民近日彌殷候人營

頓置於帷宮報蹕路觀河甚便爰自轉易西之旆恰  
符三昔迎

鑾揚趙北之鈴頻軫重隄攬轡覘淀漚白洋似鏡羣知候  
鳥來同溯墟歸碧海如門屢省沈牲告績欣曩歲捷  
莢並集雖有異漲旋消喜昨年襟帶胥恬實獲康功  
大稔由節相暨司空遞遣惟期策定一勞令水衡偕  
工府兼籌肯靳輸逾五億迨歲役而官不煩乎鼙鼓  
洎巡行而戶悉效夫香盆顧勤民者意豈憚於再三

而奉上者費虞糜其百一減番休之陪扈何須艱竿  
聯銜裁承應之綵燈勿侈館垣特繕底幾閨添鳳琯  
九十春百二增長抑且恩沛雞竿

一萬壽十千永祝用臚吟於發輒將紀帙乎行編

春露縈思合

上陵濶行况閱兩年曾

朕六旬以前率隔歲一行謁  
陵禮茲隔二年矣

撰辰

茲發舊程熟便道先瞻築堰增黃染絲條籠柳陌綠抽  
針毯坦麤塍清明已近拜瞻切上已寧闕宴賞徵

是日  
上已

畢禮翕河仍勅必別途啟輦

豫居興觀民間俗無非事惜費禁繁有所應疊幸舫輿

體益適間

去聲

陳歌舞

樂逾勝

有旨禁地方官結綵張燈而總督周元理亟以祝

釐奉

慈豫為請因祇今於楊芬港

一處畧陳

熙縱其天津亦但從鹽商因舊  
慶典者申其悃願餘概弗准

惟希長奉

大安御億萬斯年

福履膺

直隸總督周元理奏報永定河安瀾並雨水田禾

情形詩以誌慰

未接馳詢早奏來田禾茂長助如催

前因五月下旬口外雨後潮白渠諸

河水俱驟長六月初熱河雨復稍稠屋念永定河勢是否安瀾並聞京城雨水較大恐近畿田禾不無妨礙因

諭詢周元理而周元理於未接傳諭之前已奏到茲稱近京州縣雨正及時禾苗益滋長發並無積潦云

永定瀾安也雖洩金門流斷哉

周元理覆奏五月下旬以後永定河水勢雖猛

大溜直走中泓迅趨下口六月初一日金門臨遇水六寸未逾時即已斷流覽奏為慰仍諭於臨下倣南河毛

城舖之例於水遇後疏濬於沙俾無壅阻並擬浚船歸實用

周元理並奏浚船一項原係與

東曰修會商添設且河道專責尤不可因循春間即飭道廳督率兵丁往來挑挖遇有淤背阻礙復為裁切此

次謂走中泓直達下  
口即資浚船之益

敢惟竹楫恃長材治河永逸慙無

策救弊相將忖度該

永定河惠濟祠瞻禮

乾隆四十一年二月

廟宇維新恒賴後

神靈妥佑久經前落成此日瞻苞茂肅拜一時致敬虔  
鞏固玉鱗隄護甸安恬金鏡浪歸川嘉名永定貽

皇祖惠濟畿封億萬年

過盧溝橋

冰解盧溝渾水披長橋虹亘復經之幸逢耆定告成日  
況值清明拜掃時宿按東來那敢滯山遙西望已含悲  
憑輿俯視洪波浩修築宣防有所思

過盧溝橋

乾隆四十三年

昨夜復霏雪今晨乃作風啟程寧慮冷卜歲可希豐凍  
渚仍積素元冰尚未融永籌安晏策不外得人中

石景山禮惠濟祠因成一律

乾隆四十四年

兩歲經過惟致叩茲來未可復興言翕川猶弗事修堰

隔省因之溯遠源一自過橋虞汜濫恒殷禮 廟惠黎  
元亭中

皇考穹碑峙慶祝安瀾意永存

過盧溝橋作

盧溝橋下溶溶水凍解元冰流順軌凌汛桃汛相繼來  
伏秋二汛大於此河高隄亦隨之高騎牆艱致永逸爾  
咨之督臣及河道惟曰救弊而已矣下口聊可數年延  
永定河素稱難治自乾隆乙亥年親臨閱視改由下口  
六工彼時方觀承奏云計二十年可無河患今已二十



餘年河流仍得循軌項台見督臣周元理及河道蘭第  
錫詢及永定河情形據奏下口近年逐漸淤高遇伏秋  
大汛防護頗為不易惟於冬間挑挖河身二千餘丈深  
以四尺六尺為率寬以八丈至十八丈為率俾盛漲時  
河溜可以循行不致旁溢然亦不過補偏救弊之法約  
計尚可延數年云云永定河工欲期一勞永逸實無善  
策祇可盡人力補苴惟祈  
天  
佑  
神助庶得長慶安瀾耳  
數年已後如何理自

問實亦之善策何以責人蒿目視

### 過盧溝橋作

數節逮桑乾渾流祇細瀾祥符欣日近

永定河至桑椹時必乾數日其

乾之日少為夏至無暴漲之徵今歲祇乾二日河道蘭第錫以為幸云

鞏護幸隄寬敢恃

茲波宴而忘夏潦漫南瞻更繿慮虔祝大河安

豫省儀封漫口

自去秋至今春屢築屢開及移引河向上工完放溜將  
屈垂成昨忽狂風浪激於新築北壩口門復衝塌二十  
餘丈茲復改挑引溜溝諭令寬深並命自壩臺進埽斜  
向西南成挑溜之勢逼大溜趨注東北以期引河順利  
現今加緊趕辦冀速合龍惟賴

天佑神助早得歲工耳

### 過盧溝橋

乾隆四十五年

撰吉啟行旌南巡第一程東風石橋嫩積雪野田明燈  
節烟村近韶年象物亨春冰猶未解元玉鏡光平

永定河漫口合龍詩以誌慰

秋霖永定汎情形據報北隄漫水渟

表守伺奏永定河北隄堵築漫口於

初九日開放引溝趕緊堵口大溜水勢已由引河暢達大河

幸是捷築風有備遂教

堵築刻無停

此次永定河漫口料物風有儲備該督董率道廳等堵築該道蘭第錫駐工趕辦不

遺餘力於八月初九日酉刻合龍其文武各員雖有應得疎防處分而歲工迅速仍勅交部議叙分別勸懲使功過各由來功過不相掩祇愧宣防乏善經曰慰何曾不相掩

真是慰尚餘殷念望睢寧

### 團河行宮作

團河本是鳳河源疏濬於傍築館軒斷手三年未一到

團河出南苑牆隴為鳳河又東南流資滌永定河之濁  
由大清河歸海既經疏濬因於傍構築數字以供臨眺  
惟登覽無暇故工成三年始因路便一到耳  
臨者此日識長言非關疎懶身  
無暇惟愛樸淳志弗諛流出清波刷渾水資安永定意  
斯存

### 過盧溝橋

東曰歸心西已悲拜瞻猶遲

去聲

四朝期過橋絮矩懷南

漬

時陳輝祖奏雖寧郭家渡漫工東西兩壩同時進埽  
擬於九月十五以前趕堵合龍似可不日藏工而李

奉翰奏考城芝蔴壩工合龍後張家油房新刷溝槽又  
塌十餘丈等語是河南新工又不知何日方可合龍矣

遇漲衝隄亦北陸

昨據袁守伺奏永定河北隄頭工於七月中旬因雨大河水漲發水過隄

頭沖寬七十餘丈幸料物風儲督率道廳等趕緊堵築於八月初九日已報合龍

幸即合龍成

不日尚思漏蟻劇前茲由來永定原無定救弊補偏而已而

過廬溝橋

乾隆四十六年

今時名永定古曰桑乾河歷傳有明徵卜漲曾無訛桑熟必致乾多少期弗差叶乾少霖必少乾多霖定多去歲桑乾際乃延一月過以此秋霖盛衝隄害田禾幸雖

排淪成民已昏墊歌茲來遇石橋長虹接岸拖春水頗  
滿川桑時或有波桑時弗乾則無成漲也五字識民艱蒿目歎若  
何

惠濟祠二首

乾隆四十八年二月

馬邑來源本不寬過虛溝乃濫其湍補偏救弊之長策  
惟籲神庥永定瀾

橋南亦自有崇祠橋北茲因過禮寅此即百千化身  
義誠之所在佑隨之

過盧溝橋車中觀永定河即事有作

伊古未聞隄障之東坍西派任遷移畿南何處弗沙積

窪地常年歎潦滋祇以饑寒厓黎庶遂教修築始康熙

永定河向無隄工畿南霸州文安等處無歲不被水自  
康熙三十七年我皇祖軫念畿甸東南黎庶始

築隄防

賜名永定雖下口仍遠徙

無定而民被水沴者已少不無補救也

於無定者求

其定

永定河舊亦  
名無定河

皇祖愛民心永垂

過盧溝橋

有序

乾隆五十一年二月

盧溝橋建自金明昌間歷元迄明屢經整葺我

皇祖於己酉年

皇考於壬子年復加葺治長橋綿亘徑塗蕩平閱今又將  
六十年橋西二洞孔云有垂下似網兜又橋西及兩  
陲亦有稍圯裂者因命大臣和珅等勘明重葺易甃  
新石並於橋東西兩陲加長石道凡新舊百四十三  
丈發帑和雇以乙巳秋蠲吉興工至丙午春工竣茲  
恭謁



泰陵展禮五台蹕路經臨石梁羣峙萬方歸極九軌同亨  
此亦余知過論所云不可已者也因賦五言勒石以  
紀

謁

陵因禮佛啟蹕西南行長橋亘盧溝路接拱極城往來之  
通衢建金修元明

康熙己酉年

雍正壬子并胥曾以時葺行旅歌途亨今復五十載石版

或圯傾發帑給雇值曾弗力役征

明正統元年命工部侍郎李庸修葺庸請

今宛平縣自石徑山

盧溝橋

興作又四年小

七

殿西隄決發附近丁未修築又弘治三年修築盧溝橋

其時並役用民力未有如我朝内外大小輕車過橋上

大工已告成知過論有言不可已者仍

又論語觀過知仁

謂過矣予向著知過論以不知過其失小過而弗改又

從而為之辭其失大繼自今予惟視其不可已者仍酌

行之其介於可已不可已之間者率已之而已耳茲盧

溝橋為國門往來通衢發帑興葺又豈事之可已者乎

五字同碑記以勒石之貞

過盧溝橋作

乾隆戊申仲春月

通歲盧溝晏

永定河自辛卯漫水南岸頭工處取直築隄旋即合龍至庚子秋復有漫口亦即堵

築歲事近年以來仰賴河神默佑大溜直走中泓順軌安流隄工鞏固

神哉沛厚恩隄防惟益慎修治可輕言橋葺亭塗坦

盧溝橋建

自金時歷元迄明屢經修治本朝康熙己酉雍正壬子復兩次施工今又六十餘年橋面及兩陸有稍圯裂者己己秋發帑興工重加葺治並於橋東西兩陸加長石道詳見兩午過盧溝橋詩序冰消細溜潺

行將觀下口疏委自安源

自己亥年閱視永定河將下口改由條河頭入海至己亥

因下口逐漸淤高命挑挖河身以消盛漲此次復將親臨閱視雖不能一勞永逸而疏委則源自安祇可盡人

力以為補偏救弊之計耳

乾隆戊申季春月上幹觀永定河下口入大清河

處成什

乙亥閱永定熟議移下口

永定河自康熙三十七年敕築兩岸隄工由安瀾城入淀

嗣後下口改由柳岔口及王慶坨水害草壩賀老營屢經遷徙總以隄形緊束未能暢洩乾隆二十年親臨閱視將下口移今條河頭之南入沙家淀下注

南北仍存隄不過遙為守中餘

五十里蕩漾任其走水散足容沙鳳河清流有以渾會

清南入大清河受

河下口南北兩隄仍令加高培厚遙為保障中寬五十里任其蕩漾足以

散水容沙自此會鳳河而南遂成清流入大清河達津歸海

幸此卅年來無大潦為

咎然五十里間長此安窮久

近年夏秋雨水調勻未致大潦故水不為害隄外田

地歲獲有秋但自己亥改移下口以來此五十里之地不免俱有停沙目下固無事數十年後殊乏良策未免永念惕然也

五字誌惕懷怛惓增自醜

聖祖仁皇帝御製匾

南岸頭工玉皇廟

康熙三十二年

萬象同瞻

盧溝橋永定河神廟

康熙三十七年

安流潤物

世宗憲皇帝御製匾

石景山惠濟廟

雍正十年五月

安流澤潤

皇上御製匾聯

盧溝橋惠濟廟

乾隆三年四月

永佑安瀾

石景山惠濟廟

乾隆十六年

畿輔安流

北岸二工河神廟

乾隆三十八年三月

順軌貽庥

靈昭保障資惟固

馨報恬波祝有恒

北岸二工河神廟內

休哉榭

利策河防常惕若

勤求民隱倍殷然

南岸頭工玉皇廟

利普平成

元功佑輯橫流定



大德帡資兆姓安

南惠濟廟

乾隆四十一年

鞏固藉靈昭惠同解阜

馨香憑報祀濟普安恬



巡幸紀

聖祖仁皇帝巡幸

康熙三十二年

臨視渾河

駐蹕石景山

三十五年夏五月

閱視渾河

駐蹕武清縣楊村

三十七年春三月

閱視渾河

命撫臣于成龍興築隄堰

三十八年十月

閱視永定河隄

三十九年

閱視永定河

四十年夏四月永定河隄工告成

臨閱放水

四十三年四月

閱視永定河隄

四十九年春正月

巡幸五臺山

回鑾水園畢二月十七日自霸州至固安縣柳泉店

尖營由北十里鋪浮橋北渡永定河

駐蹕宛平縣屬胡林店

五十五年

閱視永定河

皇上巡幸

乾隆十五年春三月

巡幸五臺山

回鑾由趙北口水圍順道

閱視永定河

十八年春二月恭謁

泰陵由霸州水園

回鑾

閱視永定河沿隄行三十里至新移下口處

駐蹕

十八年冬十月

巡幸戒壇禮北惠濟廟

二十年春三月恭謁

西陵

回鑾

閱視永定河下口

二十九年

臨石景山禮北惠濟廟

三十八年春三月

閱視永定河自北岸二工九號浮橋渡河循南岸二工

至頭工禮玉皇廟

駐蹕黃新莊恭謁

西陵由天津

回鑾至東安縣

駐蹕洛圖莊

閱視永定河下口

五十三年二月

巡幸天津

閱視河工

觀永定河下口入大清河處



駐蹕天津縣屬王家廠

大營

永定河志卷首

永定河志卷首